

FEAU O LE ASO

ASO TOFI 1 TESEMA 2022

Manatu autū: O LE AO A LE ALI'I (*The cloud of the Lord*)

Tusi Faitau: Esoto 40 : 17 – 27, 34 – 38

O le upu Esoto o lona uiga o le “*ulufafo ese mai*”. E faasino i le ulufafo ese mai o le nu’u o le Atua mai le pologa i Aikupito. Mo le tusitala, o le tauluga lea ma le faamoemoe o le Esoto, o le “*faatuina o le malumalu*”. Auā o le isi lea faatonuga a le Atua na latou maua i le ala a’o iai i le mauga o Sinai. “*Ia latou faia fo’i mo a’u se malumalu, ou te nofo ai faatasi ma i latou*” (Esoto 25 : 8). E manino lelei le mafuaga o le fausia o le malumalu, a’o le ute lea ma le sini tulituli loa o le “o ese mai Aikupito”, ia nonofo faatasi ma ola fa’apa’aga le Atua ma ona tagata.

Lea la ua faatu le malumalu, a’o le molimau a le tusitala, e tusiata toe matua o faiva le Atua. E faamatala le fauina o le fale ae fai mai, “*faapei ona poloai mai ai o le Ali’i iā Mose*”. Tolaulau le faatotogaina a’o le tala lava lea, o le anofale “*faapei ona poloai mai ai o le Ali’i iā Mose*”. Foliga e amata mai lava i le faavae e o’o i lona faaogaina aemaise tapuaiga ma taulaga, fai mai le tusitala “*ua faia faapei ona poloai mai ai o le Ali’i iā Mose*”. Ae pei o le faaulufaleina ma le faapaiaina lea. Fai mai: **Ona ufitia lea o le fale fetafai o le faapotopotoga i le ao, ua tumu foi le malumalu i le pupula o le Ali’i; ua le mafaia foi e Mose ona ulufale atu i le fale fetafai o le faapotopotoga, aua ua nofo le ao i ona luga; o le pupula foi o le Ali’i ua tumu ai le malumalu.** (*Esoto 40 : 34-35*).

“**O LE AO A LE ALI’I**”, molimau va’aia ua malie Lona finagalo; ua fialia i le mea ua faia e ona tagata. “**O LE AO A LE ALI’I UA NOFO I LUGA O LE MALUMALU**”, faailoga o Lana faau’uga i le fale (malumalu) ua faia. Ia avea le malumalu ma ogatotonu o le olaga faa-Isaraelu, ia fai ma nofoaga o le tapuaiga i le Atua, a’o le punāvai o le tulafono ma aia’iga o le nofo lelei ma le amiotonu. Ui ina punitia le ulufale o Mose, peitai ua avea le a’o ma faamaufaaailoga o le auai mai o le Atua, ina ia manino Le ona le malosi e saili iai ona tagata, ma mautinoa fesootaiga ma Ia e tusa ma ala ua Ia saunia. Faailoga o le iai pea o le Atua ma ona tagata, o Le na ia togiola maia i latou ma le pologa.

Vaega o le molimau a Luka i le faasatauroina o Iesu, fai mai “*Ua o’o i le tutonu o le la, ona pogisa uma ai lea o le nu’u, ... Ua faapouliuliina foi le la, o le ie puipui foi o le malumalu ua saelugalemuina*” (Luka 23 : 44 – 45). **O LE AO A LE ALI’I** ua faaalua ai Lona auai i le satauro o Lona Alo, i le ma le tatalaina o noanoataga o le alu atu a le tagata iā te Ia. Sa toe faaalua foi Lona auai mai i le tatalaina o le tu’ugamau, ae maua ai na’o le tu’ugamau avanoa auā ua toe soifua manumalo le Faaola.

♀ *Lo matou Atua alofa e, ia fai Lou ao ma ao o le malamalama e iloa manino ai lou auai mai mo i matou. Faatasi mai ina ia manuia le auaunaga a Lau fanau i lenei aso. Faamanuia Lau Ekalesia a’o feagai ma feau. Ia i’u le aso i le vi’iga maualuga o lau Afio. Amene.*
